

武寧縣志卷三十二

藝文傳

冷進士傳

冷應登 邑人

冷公洙字晦源昇仁鄉人宣和甲辰進士授潭州司戶靖康改元遷武安軍節度掌書記朝議大夫賈修薦其才為中貴所沮不報尋罷歸紹興間叛將李成寇武寧防禦使岳飛知公有御變才檄公與湯執中禦之公得檄即募集鄉兵日夜簡練創戰陣攻守之具慷慨誓眾及成兵戰於印斗港敗之成憤甚悉眾來攻圍公等於殷土橋公冒矢突圍大呼殺賊力屈而死兄澄弟冲痛公死益發憤團練鄉勇為公報仇岳軍至冲率眾前驅奮勇擊賊斬獲無算岳聞公死哭而祭之後祀岳以公陪食焉

武寧縣志

卷三十二

藝文傳

一 五百四 四百九十字

崇陽公傳

葉惟華 邑人

葉公閻南鄉人官崇陽令有治聲子竊舉於鄉景定庚申春寇入境公被執竊請代以身公曰吾為朝廷命吏不能奮戈殺賊以固疆圉而見俘於此死有餘辜代我何為汝速去毋與我同巖賊刃也遂向賊瞋目大罵賊殺之竊見父被害益奮激與賊格賊厲聲曰而欲隨而父為齏粉乎竊曰賊賊吾父子皆宋臣而傷吾父吾恨不剗而心以祭吾父惡能與而俱生賊又殺之事聞予卹典  
曰父為忠臣子為孝子仁矣哉子夏言學以君親為務二公皆好學而有文其行義卓越如此以視夫世之恃文藻博科名沾沾以自負者何如也

按宋代葉氏人文稱盛葉惟華論列諸賢獨表此二公而

筆墨又甚簡貴以知古人傳述雖親屬貴富苟非其人亦不濫及焉此可爲收人物者一鑒也

冷提刑傳

冷治鳳 邑人

冷應元字英叔昇仁鄉人父夢虎由端平進士除容州司戶卒於官貧不能返公涕泣經營往來海嶠數四歲餘始扶櫬歸道路哀之稱曰孝子淳祐己酉以尙書舉於鄉明年第進士授龍南縣尉贛州守陳宗禮辟爲從事權知信豐興國二縣皆有政聲臺使薦其能擢漢陽軍司理以母憂歸景定二年除海寧軍節度推官與宦官李忠輔抗當事者欲擠公以媚璫上知其忠以劾章封示公尋遷禮部員外郎時大臣陳昉李伯玉馬廷鸞交章論薦改奉議郎借緋銀魚袋通判臨安咸淳二年出知婺州外戚潛悅不法公將按之悅展轉營武寧縣志

卷三十二

藝文 傳

二

五百五  
五百一十八

求公不可悅懼遂屬大吏誣以賊私下所司推鞫不實赴刑曹會勘又不實然終格於潛氏竟落職十年起知韶州德祐元年除福建提刑未至改授廣東提刑時國勢曰危唯南中半壁公就韶建都聞江南諸道失守痛哭募兵勤王十二月元兵至方率眾登陴爲守禦計而步將梁雄飛楊穩與廣帥徐直諒陰約迎降城遂陷公被執元將釋其縛欲授以官大罵不食而死崇祀忠義祠

曰公方見陷時元授以廣東宣撫虎頭金牌公擲去之丙子元曰詬罵元帥被擊繫獄將有所圖已而無濟遂矢以死嗚呼何其貞也公初爲婺守民愛之如父母公沒已七十餘年婺人兒啼尙怖曰冷婺州來卽止然則公之名著當時傳於後世者蓋可知矣

按宋史廣東經畧使徐直諒遣其將梁雄飛請降於隆興  
阿里海涯假雄飛招討使使徇廣東既而直諒聞益王卽  
位拒雄飛於石門戰敗直諒棄城遁時德祐丙子六月也  
九月東黨民熊飛聞趙縉至起兵應之攻梁雄飛於廣州  
雄飛遁熊飛遂復韶州縉入廣州十月元呂師夔將兵度  
韶嶺縉使熊飛曾逢龍禦之戰於南雄逢龍敗死熊飛奔  
韶州元人圍韶州守將劉自立以城降飛率兵巷戰敗赴  
水死蓋韶州兩陷其初陷據此傳在乙亥十二月終應元  
詬罵元帥被擊送洪獄在丙子元曰冷治鳳於應元爲從  
子親悉其事傳述自可信耳

葉宣義傳

鄭 埜

葉梗字國材廉村人少舉進士有俠氣負經世才時建炎紹

武寧縣志

卷三十二

藝文 傳

三

五百六十一

興間二聖北遷士馬蹂躪盜賊蠡起內外戒嚴公慨然有任  
荷時事意岳武穆提兵入洪州躬自杖策軍門獻攻取之畧  
岳侯與語大喜命之隨軍所至多有裨助岳甚重之官宣義  
郎廣東經畧司幹官已而詣闕條陳八事所指切中時機語  
多忠激及召赴都堂與諸大臣議不合力爭久之益憤激退  
而嘆曰老矣無能爲也遂棄綬歸隱以著述自終有沈疇集  
數卷藏於家配祀岳廟

曰蘭谷葉子進主余塾出其從祖沈疇集示余讀之其奔軼  
之氣崑瀕之文直欲效武穆精忠血性淋漓紙上非區區假  
借語言以自銜鬻者雖不見用而忠肝義膽至今凜然與日  
月爭光其陪享岳侯廟食詎不馨香也哉

按鄭埜爲朝議大夫前夔路提點刑獄公事此傳咸淳戊

辰歲作也

周學士傳

盛樂邑人

周公應合字淳叟祖友賢敷文閣學士爲宋名臣兄弟八人皆登清要父汝翼爲荆淮宣撫使有政績其先曰世修爲江西轉運使自德安遷武寧蓋友賢之曾祖也周氏以文行世其家公益好學潔修洪厓沈浸日深蹕厲以出中淳祐庚戌進士授江陵府教授尋以文名召入爲實錄院修撰景定間充江南東路安撫使司奉勅撰建康志五十卷建康者建炎二年建行宮於金陵所改也乾道慶元間屢輯地志而記載尙多闕略景定中寶章閣學士江東安撫使知建康府馬光祖始屬公取乾道慶元二志合而爲一增入慶元以後之事正譌補闕別編成書首爲留都四卷次爲圖表誌傳四十五

武寧縣志

卷三十二

藝文傳

四

五百七十四

卷末爲拾遺一卷援據該洽條理詳明如論丹陽之名本出建業論六朝揚州嘗治建業後始爲廣陵一郡之名皆極精核光祖序稱其博物洽聞學力充贍不誣也時賈似道擅權百恣國事日非公以能徵御史嘆曰言官者欲行其言朝有元奸雖言何益未拜卽上疏劾似道昏庸誤國乞正其罪上怒謫通判饒州復罷主管華州雲臺觀使歸似道敗擢直賢院學士未赴而卒公器望清峻慨然以名臣自任議論風采傾動一時帝向用頗殷然卒以忤似道見逐比公死而宋祚亦移矣初號洪厓處士有洪厓集後謫歸築園鶴溪上又號溪園先生著溪園集若干卷

曰予讀公劾似道疏至正人端士關口奪氣雖欲劾一日之忠蓋而不可得則掩卷三太息焉公文章風節卓絕一代所

爲建康志康熙間朱翰林彝尊得錄於曹通政家今尙有存者獨洪厓溪園二集子姓播遷遺亡已久而公之行事不得盡白於後世嘻可慨也

按公初名彌扈廷見時理宗易其名應合事見家譜

王夫人傳

邑令 鄒應元金匱人

夫人姓王氏浙江錢塘人幼通書史明大義識畧過人長適元進士河南盛公添祥添祥歷官至浙東大帥歿於官夫人遂家錢塘子文郁亦成進士明太祖洪武二年除知江西武寧縣事時烽煙甫息所在凋殘而武寧四面阻山盜賊出沒蹂躪特甚夫人勉文郁招來撫恤以養以教踰年邑大治久之夫人卒於署文郁尋亦卒並葬武寧子孫家焉正德間華林盜竊發破瑞州大吏檄各屬會討不克遂攻武寧孤城岌然猝無所措邑令毛丕功夜夢夫人指授方畧尅期殲滅及戰恍惚見夫人戎服臨陣左右指揮賊皆驚潰走民乃獲免丕功以其事聞於上立祠祀之文郁亦祀名宦  
曰余以乾隆辛未選任武寧令至署中邑士首爲余言夫人事余甚異之夫人沒已四百年迄今水旱疫疾禱於祠輒應按古祭法能禦大災則祀之能捍大患則祀之夫人食德茲土其馨香俎豆歿久不衰有以也夫

方僉事傳

盛 譽邑人

方公雁里諱孟縉字朝儀豫寧塔溪人素有風節論夫下事慷慨自許不苟隨人治春秋悉屏旁穿曲鑿獨得其要爲文醇樸不支有宏治先輩風年二十八領嘉靖壬午鄉薦乙未登進士授刑部主事時貴戚張延齡倚勢驕恣結闖豎中外

爲奸漁民所有以萬計從仁壽宮襲取寶玉陰蓄門客術士  
魘呪蠱煽希謀不軌事覺先後問者類通情私不以實聞上  
命覆鞫之公與指揮王佐會議曰張氏大逆臣子不忍聞苟  
緩其罪何以示天下竟奏置之法公以新進士聽重獄蹇蹇  
不避權貴直聲震京師及出理漕運江西以吳鎮爲水次軍  
民交兌萬狀悉索輸者疲於奔命又其長貳不相能聚而譁  
率格殺擾亂無能噤搯會公平其獄以軍旗悍獷非會省要  
地不足以控制請移兌豫章上從其議御史周金課公績爲  
最庚子擢邢部員外辛丑春北行尙書周期雍復舉之遷浙  
江按察司僉事初天下徵稅例由州縣里民自貢遠者或數  
千里懷金遇盜徃徃性命不可保幸而苟存有司畏罪急於  
督責至貸鬻不能償公私交困公上言曰臣過山東見小民  
號泣於道寧刃我毋傷國賦實可矜憐乞令有司衛送京師  
免其役由是著爲令而公帑無虞民得蘓重因公遇事盡言  
頗多裨益旣蒞浙益綜核明敏治無留難又倭寇爲患出入  
經營暑月積疾遂卒當是時公方精強遇盛明思奮發有爲  
大臣交章薦公上亦以爲能將用公而公卒矣父璞贈承德  
郎母吳氏贈安人取黃氏無子以姪嗣曰繼懋嘉靖甲子舉  
人公性至孝事母吳安人左右盡其歡雖外遊已戒行裝必  
涕泣再拜乃去比沒廬於墓哭甚哀晝夜不輟墓上產芝咸  
異之至今稱孝者率歸於公著有雁里集數卷人稱曰雁里  
先生

曰謨嘗過雁里墓見其石表人物頗偉著及讀墓文其力皆  
出黃夫人公故清潔方擢員外歸里行李蕭然閉戶不見客

往來餽遺悉屏絕其卒也貧不能具棺以同人賙賻始得歸夫人力營數歲乃克成墓云

雙節婦傳

邑令 馮其世

明初邑之順義鄉民蔣某有女愛貞受徐貢陳聘未字而貢陳沒愛貞悲慟乃向鏡泣曰女子修容以相夫也今已矣誰適爲容乃裂而分之以半殉貢陳自佩其半誓曰吾異日與死者相見於地下此鏡所以合也未幾兄蔣貴復沒遺孤甫二歲嫂陳氏亦勵志自矢家最貧與愛貞日蓬首泣血以織絰供朝夕愛貞年六十七陳氏年至六十五咸以節烈終當二嫠相誓撫孤機杼之側熒熒一燈授書不輟以冀其有成而卒不大昌何也天下窮孝苦節以子若孫富貴得傳者多矣若二嫠者窮鄉寒簷煢煢自守何所援藉而至今傳之不武寧縣志

卷三十二

藝文 傳

七

五百一十字

衰豈非其貞貫金石自有其不可磨滅者歷年愈久而芳聲愈烈耶往者訓導何庭僚大尹葉公棣及巡使公穆各有詩文以紀其事予令是邑久得與士夫交訪所謂雙節者皆能道其詳而有爲何葉諸公所未盡者故別傳之以俟後之采風者云

寇公傳

陳士業 南昌人

甲申闖賊李自成陷京師一時文武殉難自大學士范文貞公而下二十餘人皆抗節都城而慷慨赴義者並得祠祀其京畿以外諸藩鎮郡國死王事者不可勝數概未及錄河北屯田陝西右參議寇公其一也公敷歷中外所至著廉能聲而起家於江西南昌武寧令武寧人至今思之予好撫拾遺逸每過書肆輒搜敗帙於蛛絲煤尾中一日得年友李孝廉

頗有贈公序盛稱其吏治孝廉理學名賢不輕許人予固知公之爲人適公孫德滋手郡邑名宦志乞傳則公已爲學使者楊公兆魯廉其治狀列於郡庠俎豆予乃適然而喜曰予於公所欲得表而傳之者其又奚辭按行畧公諱可教字宅虛別號圖雲湖廣德安府應城縣人登萬歷己酉賢書越七科不第謁選授武寧知縣公少爲學期於有用嘗言爲民父母念民疾苦勿損下益上而已及任武寧留心於民痛澄宿弊囊中不名一錢郡守中州郭公亮稔知公廉恒語人曰某飲章門勺水寇縣尹飲修江勺水吾兩人頗無愧耳時方南北多事江右防禦素弛武寧地交吳楚風鶴頻驚公請於巡憲潘公曾絃特建武寧營以鄧將軍子龍孫名禪者統之別立黃竹哨號爲龍哨丫髻山哨號爲虎哨募勇敢繕器械擐

甲介馬訓練無虛日草澤奸宄無敢窺公治所者邑學宮創自萬歷傾圮特甚公至官帑如洗躊躇久之拮据經營卒新其學迄今人文日盛舉於鄉者踵接多公之力鄉民盧顯以貧頑負官緡無算誅求甚急公法懲其頑而心悲其貧盡代償之顯妻泣而讓顯曰若以頑而累慈父慈父不以若頑而累若妻子若不改行復何面目以立於天壤乎顯痛悔不已率鄉民建祠以祀公後有賊焚掠鄉里過公祠曰此寇父母祠也其勿毀邑捕魁劉京武斷肆毒公列其罪上之直指論如法及俶裝入覲京率子姓追送於途公慮其不利於己至九江京叩頭泣曰公罪我者生我也吾何忍負公痛哭而去庠生李善衡無禮於趙兵憲兵憲怒欲黜之而善衡父子皆號能文值歲試公拔其子冠軍已而曲爲請釋其居官諸如

此類轉移曲成者甚眾兵燹煨燼父老能言之而不能盡焉在武邑七載膺薦剡者二十有二舉卓異者三至崇禎丙子冬以入覲留部旋丁外艱庚辰召起兵部武選司主事擢戶部山西司郎中甲申正月遷陝西右參議兼僉事屯田河北三月十九日闖賊陷都城後十日公爲賊縛去慷慨罵賊而死

曰予聞蒲俗士大夫甫釋褐里中不肖子願往爲之役者如驚寇公舉孝廉悉謝去唯貧賤時一二蒼頭持刺往返豈不超然塵俗外哉公讀書從政重名義崇風教卒不負國以死父封翁年八十亦先公罵賊而死父子相繼以身殉難爲天地扶綱常雖古之名臣何以上焉予摘其大畧以俟太史采錄其不繫武寧事者不詳也

武寧縣志

卷三十二

藝文傳

九

五百一十一  
五百〇六字

盛烈士傳

盛 譽

盛公彌俊號逸園少立節概與其叔父潛明春秋爲縣學生並有文名以世亂不得用困於草野乙酉闖賊至鄉鄰竄匿公方危坐讀書神色端偉賊相視不敢犯公厲聲曰逆賊而至此耶明天子深仁厚澤而祖若宗生息二百餘年而故反耶吾王家秀才義不可辱速死爲幸遂以杖撻賊賊怒脅公行公益罵不絕口竟受害公室林氏素知書又從公學春秋益明大義至是避亂別所聞公遇禍泣曰夫子死得其所吾何爲獨生乃與其子婦某相抱赴江流死女服姑年十七以罵賊不屈死季子翥亦死

曰明史所書汪偉夫婦以忠顯人至今稱之公一門遭難死於節烈者凡五人然皆不見於史而卒湮滅以無聞其於沒

世何如也

八義士傳

余騰蛟

八義士者討叛將鄧雲龍不克或不屈而死或亡去然人皆稱之爲義士云雲龍少亡賴遊武寧卜蛟爲生人呼爲鄧打蛟皆賤辱之金聲桓叛江西竄入行伍營弁職久之調武寧營時天下多故雲龍專柄一隅威福自擅暴戾恣睢酷嗜殺人縣尹以下皆俯首聽命不堪其苦鄉人有貲者輒召爲千百戶月進金粟有差不給則沒其產而殲之有千戶以省母失期論斬母少寡唯一子懷千金求釋涕泣階下而子已受刃母亦一慟而絕其慘虐大率類此後加都督益橫肆日夜飲酒歌吹殺人以爲樂人人側目縣尹任天祚忤雲龍意縛至將殺之八義士集明倫堂擊鼓號於衆曰縣尹一邑之父

武寧縣志

卷三十二

藝文傳

十

五百十三  
四百八十五

母也今至於此尙忍與此賊俱生乎遂興義旅期尅日戮雲龍於市雲龍大怒急麾所部索八義士義士之黨遂解而縣尹自此長往矣八義士者曰羅懋備二靄汪起龍明德盛彌科文選杜棟貞吉張安世尊美陳六奇元伯六人皆庠生又二人逸其名或曰其一爲張令尹元會云

國朝

鮑馬二公傳

盧金鏡

聖祖仁皇帝之十有三年江西總兵楊富叛伏誅餘黨四逸爲賊皆巾白以哀其主稱自頭兵糾合滇孽所至焚殺劫掠無所憚郡縣苦之武寧以孤城處萬山中數被害而卒保無虞則鮑馬二公之爲力多也賊初來寇一由南鄉朱家山入一由瓜源間道入鮑公星夜詣鄉召集鄉

勇七百人同馬公督兵進勦瓜源賊賊敗遁歸靖安其寇南鄉賊亦敗走武寧解嚴明年賊陷寧州乘勝東下徧縣西南爲犄角西營羅垵南營楊浦沙田而靖賊楚賊同時寇瓜源龍腹兩處旌旂絡繹數十里不絕金鼓聲徹崕谷偵者守者悉錯愕失色而二公不爲動且授以密計設伏出奇與賊相持五晝夜雨淋漓不止賊砲不得發城上矢石如雨下多殺賊賊忿攻城益急會都統朱某援兵至乘霧入城遣鐵騎出斷賊歸路旣霽大軍鼓噪而出賊駭且奔馬公率所部直搗賊營鮑公麾鄉勇從之斬首千餘追至茶培港水暴漲賊皆淹沒諸鄉勇又逐擊羅垵沙田諸賊死傷無數生擒四十餘人縣城之圍乃解初鮑公聞賊之來寇也捐貲修城先事

爲備且慮營兵寡弱不任戰守急召九鄉勇健士入城給以口糧爲固守計又令設屯隘口保里相望賊至則鄉勇迎之營兵繼之左右夾擊賊遂不支捷卽厚賞之以故鄉勇益奮強於營兵方是時數百千烏合之人爭鋒野戰非有簡閱組練之師也非有超乘奪稍之技也而鮑公矢以血性結以恩誼人人願出死力不撓於利害而一以殺賊爲事遂至無鄉不戰無戰不克可不謂善用其民哉已而賊復入寇徧西南關壓水而陳馬公密遣馬兵暨鄉勇二百人伏獅子崕賊舟濟西渡砲發殲之賊分隊東南者從淺水渡飛奔城下城中戒嚴童子亦登陴擲瓦礫擊賊賊少卻馬公急率步兵鄉勇渡自西關攻賊壘伏發繞出賊後夾擊之賊大敗斬首數

百級禽一十一人獲旂幟器械無算賊自是不敢犯縣城矣馬公幼嫻韜畧以進士顯適四郊多難出才力以衛我山城保我黎庶功誠偉哉鮑公一書生耳獨能激勵鄉勇忘死生聽馬公部署而文與武出入戰守不二遂破賊於戲如鮑公者亦人傑也後鮑公以軍功內陞而馬公困於資不得上聞竟於邑以死悲夫鮑公名泓鄞縣人任縣事馬公名文燦江寧人官守備既並志名宦且爲傳以詳其功蹟云

曰予嘗謁鮑公祠竊歎我武於古人予祀之義何其合也然予又聞馬公塋東郊無一人奠麥飯拜墓下者豈功不及鮑公哉漠然寒山青燐一炬神沒而食報亦淺及弔古者謂是禦災捍患人也抑又悲矣

徐都督傳

盛元績

都督姓徐名月吉行二曾祖天眷祖日愛父文環世居小港有隱德以都督貴均贈一品榮祿大夫都督生有異徵術者奇之曰此子他日必貴惜父母不及見也已而孩與兒童相角逐卽疊石爲陣命諸童子爲偏爲裨聽部署都督儼然爲上將且曰異日貴顯不相忘也方是時天下初定兵革未息都督年漸長慨然有削平羣盜之意顧諸父老曰定遠侯建旄仗鉞立功邊陲死且不朽而予負七尺軀日健飯其將止此耶後去之江左主曾呂家呂久在營伍會昭勇將軍楊捷征小梁山呂親老不能行代以都督有功授千戶長事在順治十六年尋征福建漳泉廈門直入賊營獲渠帥克復數郡遷

明威將軍康熙八年從大兵勦臺灣戰江寧旋駐金門屯陳倉大小二十餘戰所至有功二十三年奉

詔征雲貴都督身先士卒衝冒矢石連破一十九砦晉階左都督管陝西寧夏鎮標遊擊事於是始以原姓名上

聞勲封三代歲丁丑

御駕親征噶爾旦於烏輿命都督爲先鋒大破之授花馬池東協副總兵官兼勒布喇哈番加一十九等留鎮者四年而都督年已六十七矣明年

陞見乞休

聖祖慰留至再始

允其請

御賜袍酒晉階榮祿大夫馳驛還鄉於斯時也武之人始知有

武寧縣志

卷三十二

藝文傳

十三

五百十一  
四百〇二字

都督而都督亦垂意桑梓訪舊相識無一存者與邑父老談往事趺坐竟日顧盼自雄其精神至老彌健視班定遠爲何如也都督字元功號泰菴卒年八十五予先兄士極初爲都督孫壻猶獲拜都督於閣下嘗爲予道其本末如此云

曰予觀都督自幼從軍戮力行陣大小經百餘戰身無完膚豈復作生還想也然卒賴

國恩異數頻加退老林泉可謂榮矣乾隆三十年纂修國史奉文徵取行實紀名入傳殆所云功在社稷沒而可祭於鄉者與

盧都督傳

楊光斗

盧達字瑞芝長樂鄉松村人身經大小百戰初授千戶

尋授明威將軍昭勇將軍及平雲貴有功乃拜左都督  
晉封榮祿大夫方

聖祖仁皇帝之己未春命都督從總督董徃討滇黔諸寇五月  
攻烟溪甲冑連日不解大破之秋從簡親王勦賊紫  
陽河屢捷賊敗走追至武岡州救被難尙民四千四百  
餘人明年春破黃茅嶺隘口追賊至黔陽賊潰夏靖州  
賊倡亂血戰數日克之旋攻大岷門恢復鎮遠府衛城  
遂駐防鴨池河河水汪洋澎湃浩浩兼天賊截渡無舟  
都督奉令渡河士卒苦之尋編竹爲筏乘風破浪我主  
帥從壁上觀筏如葉人如豆飛渡中流賊見胆落追至  
黔西賊遯方是時滇黔甫平而馬寶復爲寇四川矣都  
督衷甲銜枚偵探虛實得間卽領兵攻綏寧誘之嘗之  
衡之翼之拔其營禽之岡州隘諸賊遂棄輜重如鳥獸  
散而西南悉平初都督年五十一効用督糧署甲寅江  
西楊富爲亂大兵駐江城下令造戰船無有應者都督  
詣軍門曰能如期報竣試諸江大小朦朧金翅以輪擊  
水一一如法撫軍奇之乙卯遂命都督從李巡道禽奉  
新賊從吳副將恢復西北七邑丁巳從董總督敗撫州  
賊秋攻廣信與賊戰自寅至酉不休者數日賊潰乃班  
師冬進勦楊一豹衷賊甬搗賊巢江西自此平矣嗟夫  
都督掘起隴畝非將門子又未嘗讀七子書算勝衽席  
卒能勇敢過人戰則無有不克而造船編竹雖諳韜畧  
者不如夫豈天授哉抑予覽徐都督月吉遺封與都督  
功績相埒及歸豫寧云亡自童子休自耄年都督則五

十從軍自甲寅至丁卯以榮祿大夫休致卒年八十有二可謂奇矣

水園曰予讀鍊鎗傳云人死留名豹死留皮武人血性過人勲垂竹帛豈偶然哉吾豫寧得兩都督悉以微賤致富貴且得壽終詩曰方叔元老克壯其猷信夫

鄉勇合傳

李趣堂

康熙甲寅江西總兵楊富叛伏誅餘黨戴白巾稱白頭兵竄入靖安武寧與靖鄰東西南北賊勢蜂聚而豕突邑侯鮑公壯兵十人守府馬公部卒百餘人二公者誓死孤城羽書馳四境而鄉勇遂人人出死力殺賊賊平城亦無恙而予讀鮑公定變畧我武以孤城縣萬山中非有金湯之固諸鄉勇以耕鑿息作之人未嘗讀孫吳

武寧縣志

卷三十二

藝文

傳

十五

五百十八  
四百九十一

書一旦忠義固結家自爲屏里自爲翰血性淋漓以衛社稷功成而邑侯猶嘖嘖獎借不已乃稱勇哉於是攜藥拏手四百餘人入城死守者則李君召羅恩也寄妻子傾家私會集鄒楷鄒英文張時中熊英旺張玉繼諸義士戰守石門大路小流諸村自甲寅歷丙辰殲賊無數鮑公劄賜寸許云諳武通文者則張居午也至今硃墨爛然讀之令人流涕朱家山爲靖賊衝衢蹂躪我平原毳浦艾嶺羅溪一戰而奪輜重旗幟衝陣斬百十七級則張禹門周惟達也後復偕同里明經蕭引鳳城北孝廉陳思珊諸生汪起龍南市盛永齡招撫百餘人嗟乎微禹門里人迫脇逃匿幾陷賊黨矣而靖賊之由間道出瓜源長墅源也練長余仲岳盧秋方盧以良盧季立盧樓

輅盧興讓盧公言石連城柯斗南統鄉勇七百餘人一戰俘賊四再戰殺賊九三戰殺賊十餘人四戰斬獲無算賊由間道入者悉潰方是時九鄉相犄角誓與賊不俱生而援兵大帥朱都統已至城下武寧寇患稍稍息矣歲丁巳昇仁鄉上北山劉可北禽一僧赴縣則僞監軍道莫友榮也友榮自黔入寧州爲賊渠事敗逃匿靖建二年黨絕援盡至武始成禽其餘勤偵探守斥堠防賊無殊功者不錄鮑馬二公遺書缺名不濫云

余巴陵公傳

余光廷

巴陵邑侯余公采臣名天亮安樂鄉人生而骨鯁稜稜不肯近人人亦罕有近者族文學均國愛之與子司訓公肆力於古遂成佳子弟年十九補邑庠課生徒以養母康熙丙子領鄉薦里人艷之後學多從之遊然公震起於老成衰謝之餘力又足以傾俗學轉風氣而心復欲然自下其意量蓋遠矣哉

憲皇帝御極之元年奉

命宰巴陵舊浮徵稅銀漕耗悉除之隣治華容富紳屠民塚構宅有年訟華容弗白訐岳州檄公往勘富紳賂以金却之平其獄毀宅還塚其廉明類如此楚中丞王公諱之樞者喜公初膺民社政績卓然方議破格上薦公顧以老致仕一時留者攀輿眷戀不忍別及出境吏民悉泣下數行作去思碑建生祠祀名宦嗟夫如我公之爲巴陵邑侯固不朽然豈不朽巴陵已哉初公之北上也偕分寧孝廉胡從憲行憲沒都中公舁櫬以旋無難色

及公致仕歸道經華容百姓無老幼皆跪迎之餞送三日公慰勞之始還觀斯二者公豈百里才耶卽令偃蹇不出其所行事可以風矣

盛教授傳

邑令 鄒應元

盛先生諱際斯號成十其先居錢塘明洪武間故進士文郁令武寧歿於官子孫遂隸籍世爲武寧人自文郁十傳至贈公德壽世有隱德贈公生子三先生其季也先生生而穎異年數歲口授周易卽能了大義稍長折節讀書會兵燹書籍散佚遂從諸舊家借錄口誦手編不少輟其吝不與者止其家旬日輒默記而歸弱冠學大就補博士弟子尋充貢入太學何太史義門一見大奇之遂與訂交義門天下士也遇人少當意而獨推重

武寧縣志

卷三十二

藝文 傳

十七

五百三十一  
四百八十七

先生屢困場屋不第選樂平教諭旣之官開講席引進後輩以經史相磨勵歷寒暑不倦其貧無資者捐俸給之一時諸生感激皆就學先後受業者率有法度可觀有二生兄弟爭產請平於學惟意所左右願納千緡先生責以大義皆涕泣式好如初某生失禮縣尹將斥之生懼懷金以請先生揮之後竟釋不問其識力之定多類此先生好文獻任樂平益搜討不厭時中丞白公修省志檄下徵遺事先生發書親自校讐上之魯臥雪王松塢程正之諸公文稿列於志乘皆先生力也後遷吉郡教授上官廉其狀上章薦之力辭以年老乞休遂歸里先生事親孝事兄悌元配李氏繼鄭氏生子四皆有文行能世其家

曰朝廷設官命名各有取義若先生者其真教諭矣暮夜投金截然不動求之廣文中豈易有哉吾嘗過成十先生講堂見三尺稚子語言皆有準繩嗚呼先生之貽留遠矣

余秀才傳

梁鳴岡

長樂鄉羅坪余公仲岳以干城之才捍衛社稷其子德有授田峻兩膺鄉賓孫志達世勲志高悉爲邑諸生而志達獨稜稜然風節自喜兄弟激昂慷慨相與論議謂讀書人斷章句工詞藻自命爲學者及見諸行事力不足以匡時功不足以垂後遺金萬鎰爲子孫計溫飽不數世而散佚無餘誠可哀也吾祖岳佐邑侯鮑公禦楊富餘黨之亂寇突出瓜源長墅源祖設伏源陰峭壁千尋下臨棧道寇踰岨伏發下石如雨擊死無算明年寇偪城邑祖率鄉勇七百餘人會官兵南市夾擊之大敗鮑公賜以額曰才可干城至今豫寧父老傳說甲寅白頭兵事徃徃流涕志達云而是役也予讀鮑公定變畧詳矣及紳士進謁道羅坪余氏子多賢仲岳之後也翌日太學生余廷相廷楨廷傑盛衣冠再拜述先人達遺狀曰豫寧志乘屢修屢弛文獻闕有間矣一二忠魂苦節埋沒荒烟蔓草中無人存問可勝悼哉後有賢邑侯莅武謀諸邑紳士起而修百餘年廢墜之典爲我遺函金五百兩以上予聞而嘉生之成先人志也又退而思仲岳出死力以靖亂一時其食報至子與孫傳之無旣如志達者身雖死精神奕奕不朽其特書以光邑乘宜

哉志達字聯泗晚年築室靖峰別號靖峰先生前捐粟百石以飲社倉捐金五十以資豫寧書院又緒餘云

潘紫葦傳

梁鳴岡

七十有七老丈潘紫葦居寒泉樓臨荷花池無事不謁官署一日進而請曰豫寧學宮湫隘規畫不周沿襲已久自度力雖不足爲一邑先竊願輸千金鼎建大成殿凡都人士應各出己貲相與以有成焉予曰是舉也崇學校重人文明大體莅武九年求之不得其人而今乃有此豈非盛哉翌日予登明倫堂道及紫葦盛舉諸紳士亦踴躍輔翼鄉市如出一詞予益喜而商確初終勗以無斃諸紳士曰潘君老成人也度材於山選匠於肆先已彌月始出而肩其年予然後益信紫葦不負予所

武寧縣志

卷三十二

藝文傳

十九

五百一  
四百七十六

望也顧予抑聞前明進士潘儻祀鄉賢子元齡乙榜建寒泉樓詩酒讌好一時稱盛蓋紫葦族祖也紫葦母萬孺人九十大壽予登堂祝之而紫葦年且老命子邑庠江候選理問孫顯祖太學生運型業儒周旋執禮甚恭予益知潘氏於武爲世族紫葦獨以樸而致富慷慨樂施毀屋獻基以廣義學捐腴田以資膏火年飢施粥歲寒施衣死者施棺何其惠也今老矣強健如年少步履不假筇杖日往來明倫堂督理土木之役以告成功其老而好義爲何如也紫葦名崇桂字上攀由太學生貢成均

洪孝廉傳

鄒應元

洪先生文機昇仁鄉中村人宋學士忠宣公裔也生而

穎敏好讀書爲文慕歐陽清紆宕逸使人一往而深不能以自已弱冠補博士弟子食餼每試輒冠軍爲諸學使所深重延入文幕校試諸郡名人文士多出所薦而先生際侘不遇至己酉始登賢書旣上公車不第遂家居講學爲樂日與子弟研書論文張其壁壘而子弟亦皆桴鼓以進後先攻取傑然爲一邑名鄉先生故清高布衣蔬食徜徉山石間褁足不入城市至邑宰願見不可得人比之爲陳白沙云先生事親孝衣服飲食必躬親友愛尤篤兄偉卒撫其遺孤次第成立岷舉孝廉威補郡學皆先生之教也歲戊辰以知縣選用方伯下牒徵之先生曰吾老矣子姪輩幸與鄉薦馳驅王路當令少年任之遂辭不赴先生字豹臣號抑菴嗣君五訓詔謙詞論皆能文各出手眼人以爲方興未艾焉予雖未得見先生素慕先生文行又與詔爲同年友以先生傳請不獲辭遂爲序次如此

陳教授傳

盛翼

陳思珊字翠池一字聖聞坊市苑橋人弱冠補弟子員甲午舉於鄉初授建昌南城學博當事廉其能委佐縣事後補授廬陵復遷筠陽教授秩滿辭歸先是甲寅白頭兵入寇南鄉爲靖賊衝衢張居午張禹門且戰且守已三年賊黨猶潰逸四出迫脇多人逃匿多人時邑侯鮑公日夜區畫造廬迎先生曰昆岡玉石焚以一炬則忍甚然齊魯爲盜風氣易以轉移先生年高而望重一出則鬼蜮烏鼠望風革面如登衽席不然魚肉我民人

奔馳我士卒蹂躪我疆土守令誓死飲血於事無濟願膏輪結紉以送先生先生曰行於是耆老盛永齡先爲開導明經蕭引鳳諸生汪起龍與先生至迫脅逃匿者悉焚香道左招撫男女五百人有奇初先生官南城城郭殘破學舍灰燼諸生流離竄伏無以爲家先生多方慰字之又脫副齋某禍一時謂爲名師慈父與吾武後先相類云嗟夫先生三擁臯比朱高安可亭梅公月溪皆爲門下士則夫先生之事蹟文章不獨彪炳一邑一鄉已也先生年八十有七乃卒

曰予觀先生修治邑乘所爲文多奇傑之氣又讀先生送鮑公序無一語及招撫事及覽定變畧知鮑公倚重先生爲長城豈不偉哉

余司訓傳

邑令

鄒應元

先生姓余氏諱文梓字季良康熙戊子歲貢官萍鄉訓導初武寧僻處郡西地荒隘兵燹後典籍煨燼學者少文先生攻苦力學爲文章高遠雄邁一時風氣所趨遂甲於他邑先生沈毅有幹畧遇事不引避尤以濟人爲急康熙十三年楊富兵亂南昌餘黨竄靖安由間道出瓜源長墅源里人陽與賊援且曰詰朝犒執事使者諾馳去次日壯士設伏靖公厓待賊賊至伏發遂驚走相繼蹈溝壑死當是時郡邑被寇者所在爲墟武寧以孤城懸萬山中藉鄉勇一戰之威而賊終不敢犯是時先生年雖少已申大義殺賊矣先生家居簡約澹然蔬布至鄉里緩急常傾橐無所吝人皆賴之歲丙申邑大水

潭埠地瀕河河驟漲先生令編木爲大桴率健夫挽之居民凡數十家需次畢渡其所全活尤無算先生負經濟才以期有用其見諸事者皆有益於當世然卒不遇而以廣文老卒年八十一子騰蛟中乾隆乙丑進士築賓竹堂獎借後進文章學問卓然爲鄉先輩人稱賓竹先生官比部郎被議歸而卒

### 盛季子傳

刑部主事 邑人 余騰蛟

盛季子劍山于埜季弟也成十先生官樂平時生季子故名曰樂水賓其字也季子幼奇傑讀書空古人墻壁洞抉深際出其所有老師宿學多不能解甘清恪見之謂人曰此一代文人也康熙庚子季子年十一于埜語予於南昌予心異之不得近而季子亦記予名書縫中

## 武寧縣志

### 卷三十二

藝文

傳

二十二

五百〇六字

又五年始與季子相見當是時季子才甚富氣甚豪出入漢魏之門以詩文跌宕自喜予方銳意天下事軒軒然欽有所出不相爲用然季子時時喜過予談予以是益奇季子己酉予僦居洪州僧舍季子襍被來就夜定酒闌縱談及鷄鳴上下數千年手指目瞬至燈炮茶磬不少休時十三郡人士筮集如雲文酒之會甚盛黃永年靜山楊枝遠季重黃世成培山皆一時名流莫不願交季子而季子馳騁其間出沒衝突顧盼自奇益爲諸君所愛重江右才雋之士知季子名自是年始予之貢太學也季子送予江上曰以子之才何所不可爭一時與爭千古孰輕孰重子其圖之比予得假歸季子聞之大喜予築存吾園日與季子兄弟往來所爲詩歌古文

掇摘予奪畧無所諱亡友王訥夫頗以東鄉爲戒季子持之益力而予與季子交因是益固

今上元年丙辰予二人者應 徵北上季子年二十七予長季子十年意氣甚壯各負所有並力而馳水驛山亭之流連通都大邑之盤桓所識海內名人譏評風月俯仰進退毫墨方新梨棗已屬由是季子之才名遂聞天下及同歸山中季子慨然以著述自許詩文日盛而交遊過訪上下修水不絕予雖獲第竊祿於朝時復以季子山居爲念已而被議南還季子已病顧予笑曰待子久矣千秋之業山中尙其可圖耶語畢輒咳骨稜稜見衣表予固嘆其臞甚又幸於今得及季子盡所欲爲而不謂竟至於死也季子生有至性甫周母鄭孺人病不食乳對母有憂色泪涔涔下病瘳乃喜事兄如師友至論古人是非必力爭病篤時猶與于埜于明辨古今人物不少假借喜飲酒與友人飲必盡歡有無一盡於友無所惜而生平所交惟予與李屯菴爲最深

曰庚寅十月朔夜樂平學署火上笑聲呵呵不止及曙而季子生鄭孺人喜曰離火文明之象也此子其以文鳴乎比壬申中秋火大笑一夕而季子竟死矣嗚呼如季子者真文人哉

季子天下士也其奇偉之氣雄雋之才有不可一世者南豐趙孝廉由儀嘗謂人曰季子胸中含孕萬有吾足跡半天下所見賢豪罕與比京恨不得日夕相親以快吾願余比部與季子相習最久相得又甚深

而力又足以出之故所言多不可爲外人道以季子  
之人之才而得以傳庶幾人以文傳文以人傳云耳

盧司馬傳

戶部員外顧長絨

司馬姓盧名璜太學生大中公冢子居大田距予白槎  
不二百里兩姓遂爲世姻司馬於予固相知久予又與  
司馬仲子太學生濟結子女好知司馬行事甚悉然往  
來不三十年司馬公已故其子貧且拙無能道述先人  
生平而予自乾隆丙申過大田至辛丑遇盛熙堂楊冰  
園于都門談及豫寧重輯邑乘有故司馬盧公者慷慨  
出千餘金以修前志雖志已燬司馬公之名不可沒也  
前豫寧志書修自邑侯劉稿初就罷去後金匱鄒蒞武  
敦請故比部余騰蛟司訓盛大謨分纂成書凡搜遺補

武寧縣志

卷三十二

藝文

傳

二十四

五百二十七  
四百九十四

闕膏火梨棗楮墨之費經數寒暑司馬供給如初又耘  
吾盧琳曰司馬之少也大中公見背遂棄舉子業養寡  
母課諸弟母病癱瘓公獨翼之葳苳藥餌非親調不進  
如是者二十年有奇矣歲癸亥邑饑出粟濟之東南賴  
以安戊寅置社倉輸穀百餘石都人士義之而予謂司  
馬公固好義者又性孝友明大體其慕義也益力其課  
諸弟也不務爲詞章之學其留心文獻也傾囊中所有  
以輯成書其不幸書成而廢也於公無言責其幸而志  
乘之重輯於今也如公者可不傳哉時辛丑秋七月得  
盧琳書於京署乃爲之傳寓實園張先生家書函中達  
豫寧司馬字肇西別號南峯太學生候選州司馬年六  
十二卒

邢侍郎傳

余鳴珂

宋吏部侍郎邢凱號坦齋長樂鄉人登嘉定甲戌袁甫榜進士以文名著有坦齋通編及致仕構鬻岡書院儲書萬卷乃稱富哉

曰有宋一海宇一祖列宗鼓磨儒學以作天下百年之間四方之文辭爛然軼於前世可謂盛矣雖文章治亂以國運爲終始而山深水澳之區往往有其人焉瀛灞奮迅以出卓然而不朽南州修水七百里西則有黃山谷東則有李宏齋毗山谷起者則有徐師川劉後村及其季也邑人周學士應合而侍郎邢公坦齋已岸然于寶慶先矣際文治之朝一時之盛久已成天下之風俗宏齋山谷諸君子之書傳矣而邢公亦當時之彥不以此彼此殊而遠近分也顧今去邢公之世五六百年求其所謂通編者不可得見予家藏書纔足數千卷力薄而寡遊不克致遠方之圖籍以究其存亡閒取通志讀之得其論詩一則其他泯滅荒殘使人長喟也公以儒學致位通顯其居官政績有可紀述者史氏旣無能問晚年結屋鬻岡下帷講學遠近文人悉至又有門弟子左右之而其書顧介於傳不傳之間則何以然哉昔韓子云達者其道行窮者其說長而予觀窮達之際公尙如此一二山澤之叟攻寂寞之詞發清幽之韻風雨晴冥鳥獸林泉之聲相爲響應自謂長矣卒無王公大人託以必顯其殘編斷稿卒不免蠹魚水火之戕敗又奚足惟哉公論東坡詩人遇喜歡來遠夢地名惶恐泣孤臣

更惶恐以對喜歡此詩人習派也於歔如公者片語亦足傳矣